



*Senin, 10 Juni 2024*

**Ogen : I Raja-raja 18:1-6**



**Munuh Nabi Dibata**



**T**upung lit gegeh dinggen kuasa pakekenlah e alu payo sabap lit pagi paksana kuasa e lanai ras kita. Kesempatan e la reh dua kali. Bage me rusur persinget isehken. Kune salah makeken kesempatan e ulihna pe labo mehuli. Isabel sekalak ratu, bas ia lit kuasa ras gegeh. Tapi kuasana e ipakekenna ku si la mehuli. Kegeluhenna mbelin ipengaruhi kinitekenna. Kitik kitikna nari jabu si mpebelin-belin ia e me jabu si nembah baal (berhala-berhala). E maka akapna kinitekenna e sipayona, sembah-sembahenna si erkuasana dinggen la banci lit kalak si deban si ngakuken maka ganjangan dibatana asangken dibata si isembahna e. La meriah ukurna ngidah bangsa Israel nembah Dibata si nggeluh, merawa dinggen cian atena. Pengakapna kin maka baal siisembahan e ngenca si patut isembah. Rawa ras cian ate e mpeturah perbahanen si ncidahken kekerasen. Ipakena pe kuasa si lit i bas ia paksa si e guna munuh nabi-nabi sinembah Dibata bangsa Israel. Perbahanenna enda la jadi pandangan i bas kerajaan paksa si e erkiteken ia ratu sierkuasa. E maka labo lit iukum ras irawai erkiteken raja pe erpengakap perbahanenna e labo salah. Amin bage gia, Obaja selaku sekalak si ertugas guna ngurusi istana erusaha nelamatkan nabi-nabi e alu mbuniken nabi-nabi e bas gua. La cukup bunikenna, nelamatkanca tapi iaturkenna pe perpanganen nabi-nabi e segelah tetap aman ras tercukupi keperlunna. Palas perbahanen Obaja enda erkiteken tutus ia nembah man Dibata. Kinitutusenna e mereken hikmat kepentaren meteh kai si mehuli ras singena ate Dibata. Pang ia petembil ras ratu erkiteken biaren ia man Dibata asangken ratu enda. Biak ratu e terjeng ieteh tapi la man usihen.

Erlajar arah perbahanen Obaja, sipakekenlah kesempatan guna ngukuri ras ndalanken kiniulin. Pedauh tindakan kekerasen sabap e labo ndungi persoalen. Lit saja si ipake Tuhan guna nelamatkan kalak si benar. Mehamat dinggen kelengilah serayan Tuhan sabap ia me pilihén Tuhan guna jadi aronNa si ndahiken dahin Dibata i doni enda.

☞ *“Lit lalap cara Dibata guna engkawali aronNa”*

